

四庫全書

經部

欽定四庫全書

經部

五禮通考卷八十

詳校官侍郎臣劉躍雲

給事中臣溫常綬覆勘

總校官進士臣繆琪

校對官中書臣吳紹昱

謄錄監生臣宋學濂

欽定四庫全書

五禮通考卷八十一

刑部尚書秦蕙田撰

吉禮八十

宗廟制度

唐書高祖本紀武德元年六月己卯追諡皇高祖曰宣
簡公皇曾祖曰懿王皇祖曰景皇帝廟號太祖皇考曰
元皇帝廟號世祖

禮樂志書曰七世之廟可以觀德而禮家之說世數不同然自禮記王制祭法禮器大儒荀卿劉歆班固王肅之徒以為七廟者多蓋自漢魏以來創業之君特起其上世微而無功德以立四廟故其初皆不能立七廟武德元年始立四廟曰宣簡公懿王景皇帝元皇帝

舊唐書禮儀志武德元年五月備法駕迎宣簡公懿王景皇帝元皇帝神主附於太廟始享四室

于志寧傳貞觀三年志寧為中書侍郎加散騎常侍太

子左庶子黎陽縣公是時議立七廟羣臣皆請以涼武昭王為始祖志寧以涼非王業所因獨建議違之

唐書禮樂志貞觀九年高祖崩太宗詔有司定議諫議大夫朱子奢請立七廟虛太祖之室以待於是尚書八座議曰禮天子三昭三穆與太祖之廟而七晉宋齊梁皆立親廟六此故事也制曰可於是祔弘農府君及高祖為六室

舊唐書禮儀志貞觀九年高祖崩將行遷祔之禮太宗

命有司詳議廟制諫議大夫朱子奢建議曰案漢丞相
韋玄成奏立五廟諸侯亦同五劉子駿議開七祖邦君
降二鄭司農踵元成之轍王子雍揚國師之波分塗並
驅各相師祖咸翫其所習好同惡異遂令歷代祧祀多
少參差優劣去取曾無畫一傳稱名位不同禮亦異數
易云卑高以陳貴賤位矣豈非別嫌疑慎微遠防陵僭
尊君卑佐升降無舛所貴禮者義在茲乎若使天子諸
侯俱立五廟便是賤可以同貴臣可以濫主名器無準

冠履同歸禮亦異數義將安設戴記又稱禮有以多為
貴者天子七廟諸侯五廟若天子五廟纔與子男相埒
以多為貴何所表乎愚以為諸侯立高祖以下并太祖
五廟一國之貴也天子立高祖以上并太祖七廟四海
之尊也降殺以兩禮之正焉前史所謂德厚者流光德
薄者流卑此其義也伏惟聖祖在天山陵有日祔祖嚴
配大事在斯宜依七廟用宗大禮若親盡之外有王業
之所基者如殷之玄王周之后稷尊為世祖倘無其例

請三昭三穆各置神主太祖一室考而虛位將待七百
之祚遞遷方處庶上依晉宋旁愜人情於是八座奏曰
臣聞揖讓受終之后革命創制之君何嘗不崇親親之
義篤尊尊之道虔奉祖宗致敬郊廟自義垂闕里學滅
秦庭儒雅既喪經籍湮殄雖兩漢纂脩絕業魏晉敦尚
斯文而宗廟制度典章散逸習所傳而競偏說執淺見
而起異端自昔迄茲多歷年代語其大略兩家而已祖
鄭玄者則陳四廟之制述王肅者則引七廟之文貴賤

混而莫辨是非紛而不定陛下至德自然孝思罔極誠
宜定一代之弘規為萬世之彝則臣奉述睿旨討論往
載紀七廟者實多稱四祖者蓋寡較其得失昭然可見
春秋穀梁傳及禮記王制祭法禮器孔子家語並云天
子七廟諸侯五廟大夫三廟士二廟尚書曰七世之廟
可以觀德至于孫卿孔安國劉歆班彪父子孔晁虞熹
干寶之徒或學推碩儒或才稱博物商較今古咸以為
然故其文曰天子三昭三穆與太祖之廟而七晉宋齊

梁皆依斯義立親廟六豈非有國之茂典不刊之休烈乎若使違羣經之明文從累代之疑議背子雍之篤論尊康成之舊學則天子之禮下偏於人臣諸侯之制上僭於王者非所謂尊卑有序名位不同者也况復禮由人情自非天墜大孝莫重於尊親厚本莫先於嚴配數盡四廟非貴多之道祀逮七世得加隆之心是知德厚者流光乃可久之高義德薄者流卑實不易之令範臣等參議請依晉宋故事立親廟六其祖宗之制式遵舊

典庶承宗之道興於禮定之辰尊祖之義成於孝治之
日制從之

蕙田案子奢論七廟是

貞觀二十三年太宗崩將行崇祔之禮禮部尚書許敬
宗奏言弘農府君廟應迭毀案舊儀漢丞相韋玄成以
為毀主瘞埋但萬國宗享有所從來一旦瘞埋事不允
愜晉博士范宣意欲別立廟宇奉征西等主安置其中
方之瘞埋頗協情理事無典故亦未足依又議者或言

毀主藏於天府祥瑞所藏本非斯意今謹準量去祧之外猶有壇墀祈禱所及竊謂合宜今時廟制與古不同其基別室西方為首若在西夾之中仍處尊位祈禱則祭未絕祗享方諸舊儀情實可知弘農府君廟遠親殺詳據舊章禮合迭毀臣等參議遷奉神主藏於夾室本情篤教在禮為弘從之其年八月庚子太宗文皇帝神主祔於太廟

文明元年八月奉高宗神主祔於太廟中始遷宣皇帝

神主於夾室

唐書武后本紀垂拱四年正月甲子增七廟立高祖太宗高宗廟於神都

舊唐書禮儀志垂拱四年正月又於東都立高祖太宗高宗三廟四時享祀如京廟之儀別立崇先廟以享武氏祖考則天尋又令所司議立崇先廟室數司禮博士崇文館學士周惛希旨請立崇先廟為七室其皇室太廟減為五室春官侍郎賈大隱奏曰臣竊準秦漢皇太

后臨朝稱制并據禮經正文天子七廟諸侯五廟蓋百
王不易之義萬代常行之法未有越禮違古而擅裁儀
注者也今周祚別引浮議廣述異文直崇臨朝權儀不
依國家常度升崇先之廟而七降國家之廟而五臣聞
皇圖廣闢實崇宗社之尊帝業弘基實等山河之固伏
以天步多艱時逢過密代天理物自古有之伏惟皇太
后親承顧托憂勤黎庶納孝慈之請垂矜撫之懷實所
謂光顯大猷恢崇聖載其崇先廟室合同諸侯之數國

家宗廟不合輒有移變臣之愚直並依正禮周宗之請
實乖古儀則天由是且止

蕙田案賈議辭嚴義正卓然不可磨

唐書武后本紀 嗣聖七年

即武后天
授元年

九月丙戌立武氏

七廟於神都十月改唐太廟為享德廟以武氏七廟為
太廟

禮樂志天授二年則天既革命稱帝於東都改制太廟
為七廟室奉武氏七代神主附於太廟改西京太廟為

享德廟四時唯享高祖已下三室餘四室令所司閉其門廢其享祀之禮又改西京崇先廟為崇尊廟其享祀如太廟之儀

蕙田案武氏之罪此為最大

中宗本紀神龍元年正月丙午復於位五月壬午遷武氏神主於崇恩廟乙酉立太廟於東都八月乙亥祔孝敬皇帝於東都太廟皇后見於廟十一月壬午及皇后享於太廟大赦壬寅皇太后崩廢崇恩廟

禮樂志初唐建東西二都而東都無廟則天皇后僭號稱周立周七廟於東都以祀武氏改西京唐太廟為享德廟神龍元年中宗復位遷武氏廟主於西京為崇尊廟而以東都武氏故廟為唐太廟祔光皇帝以下七室而親享焉由是東西二都皆有廟歲時並享

蕙田案東西二都立廟並享非禮也

舊唐書禮儀志神龍元年正月改享德廟依舊為京太廟五月遷武氏七廟神主於西京之崇尊廟東都創置

太廟太常博士張齊賢建議曰昔孫卿子云有天下者
事七代有一國者事五代則天子七廟古今達理故尚
書稱七世之廟可以觀德祭法稱王立七廟一壇一墀
王制云天子七廟三昭三穆與太祖之廟而七莫不尊
始封之君謂之太祖太祖之廟百代不遷禘祭之禮毀
廟之主陳於太祖未毀廟之主皆升合食於太祖之室
太祖東向昭南向穆北向商之玄王周之后稷是也太
祖之外更無始祖但商自玄王已後十有四代至湯而

有天下周自后稷以後十有七代至武王而有天下其
間代數既遠遷廟親廟皆出太祖之後故合食有序尊
卑不差其後漢高受命無始封祖即以高皇帝為太祖
太上皇帝之父立廟享祀不在昭穆合食之列為尊於
太祖故也魏武創業文帝受命亦即以武帝為太祖其
高祖太皇處士君等並為屬尊不在昭穆合食之列晉
宣創業武帝受命亦即以宣帝為太祖其征西豫章潁
川京兆府君等並為屬尊不在昭穆合食之列歷茲以

降至於周隋宗廟之制斯禮不改故宇文氏以文皇帝
為太祖隋室以武元皇帝為太祖國家誕受天命累葉
重光景皇帝始封唐公實為太祖中間代數既近列在
三昭三穆之內故皇家太廟唯有六室其弘農府君宣
光二帝尊於太祖親盡則遷不在昭穆合食之數今皇
極再造孝思匪寧奉二月十九日勅七室以下依舊號
尊宗又奉三月一日勅既立七廟須尊宗始祖速令詳
定者伏尋禮經始祖即是太祖太祖之外更無始祖周

朝太祖之外以周文王為始祖不合禮經或有引白虎
通議云后稷為始祖文王為太祖武王為太宗及鄭玄
注詩雍序云太祖謂文王以為說者其義不然何者彼
以禮王者祖有功宗有德周人祖文王而宗武王故謂
文王為太祖耳非祫祭羣主合食之太祖今之議者或
有欲立涼武昭王為始祖者殊為不可何者昔在商周
稷高始封湯武之興祚由稷高故以稷高為太祖即皇
家之景皇帝是也涼武昭王勲業未廣後主失國土宇

不傳景皇始封實基明命令乃捨封唐之盛烈崇西涼之遠構考之前古實乖典禮魏氏不以曹參為太祖晉氏不以殷王卬為太祖宋氏不以楚元王為太祖齊梁不以蕭何為太祖陳隋不以胡公揚震為太祖則皇家安可以涼武昭王為太祖乎漢之東京大議郊祀多以周郊后稷漢當郊堯制下公卿議議者多同帝亦然之杜林正議獨以為周室之興祚由后稷漢業特起功不緣堯祖宗故事所宜因循竟從林議又傳稱欲知天上

事問長人以其近之武德貞觀之時主聖臣賢其去涼武昭王蓋亦近於今矣當時不立者必不可立故也今既年代浸遠方復立之是非三祖二宗之意實恐景王失職而震怒武昭虛位而不答非社稷之福也宗廟事重禘祫禮崇先王以之觀德或者不知其說既灌而往孔子不欲觀之今朝命惟新宜應慎禮祭如神在理不可誣請準勅加太廟為七室享宣皇以備七代其始祖不合別有尊崇太常博士劉承慶尹知章又議云謹案

王制天子七廟三昭三穆與太祖之廟而七此載藉之明文古今之通制皇唐稽考前範詳採列辟崇建宗靈式遵斯典但以開基之王受命之君王迹有淺深太祖有遠近湯文祚基稷禹太祖代遠出乎昭穆之上故七廟可全若夏繼唐虞功非由鯀漢除秦項力不因堯及魏晉經圖周隋撥亂皆勲隆近代祖業非遠受命始封之主不離昭穆之親故肇立宗祊罕聞全制夫太祖以功建昭穆以親崇有功百代而不遷親盡七葉而當毀

或以太祖代淺廟數非備更於昭穆之上遠立合遷之君曲從七廟之文深垂迭毀之制皇家千齡啟旦百葉重光景皇帝濬德基唐代數猶近號雖崇於太祖親尚列於昭穆且臨六室之位未申七代之尊是知太廟當六未合有七故先朝唯有宣光景元神堯文武六代親廟文帝登遐神主升祔於廟室以宣皇帝代數當滿準禮復遷今止有光皇帝已下六代親廟非是天子之廟數不當有七本由太祖有遠近之異故初建有多少之殊

敬惟三后臨朝代多儒雅神枋事重禮豈虛存規模可
沿理難變革宣皇既非始祖又廟無祖宗之號親盡既
遷其廟不合重立若禮終運往建議復崇實違王制之
文不合先朝之旨請依貞觀之故事無革三聖之宏規
光崇六室不虧古義時有制令宰相更加詳定禮部尚
書祝欽明等奏言博士三人自分兩議張齊賢以始同
太祖不合更祖昭王劉承慶以王制三昭三穆不合重
崇宣帝臣等商量請依張齊賢以景皇帝為太祖依劉

承慶尊崇六室制從之尋有制以孝敬皇帝為義宗升
祔於太廟其年八月宗祔光皇帝太祖景皇帝世祖元
皇帝高祖神堯皇帝太宗文武聖皇帝皇考高宗天皇
大帝皇兄義宗孝敬皇帝於東都之太廟躬行享獻之
禮

蕙田案張齊賢論唐太祖之說極是而以尊
於太祖之祖為不在合食之列則未審也蓋
時享所奉七廟之定制也太祖而外三昭三

穆論親而不論功德祫祭之禮毀廟所合食也太祖而外凡為祖者無拘太祖前後皆得與食亦論親而不論功德蓋世數有近遠古今有時宜禮以義起者當如是若如漢魏以後屬尊不合食之例安得謂之祫祭乎劉承慶等六廟之說自亦權宜至以孝敬帝升祔足數則非禮矣

觀承案屬尊不合食之例殊謬蓋不知禮以

義起故也故唐人禘祫紛紜當以昌黎之議
為得情理之中

景龍元年正月丙戌復武氏廟陵置令丞守戶

舊唐書禮儀志神龍二年駕還京師太廟自是亦宗享
七室仍改武氏崇恩廟明年二月復令崇恩廟一依天
授時享祭時武三思用事密令安樂公主諷中宗故有
此制尋又特令武氏崇恩廟齋郎取五品子充太常博
士楊孚奏言太廟齋郎承前只七品以下子今崇恩廟

齋郎既取五品子即七廟齋郎作何等級上曰太廟齋郎亦準崇恩廟置乎奏曰崇恩廟為太廟之臣太廟為崇恩廟之君以臣準君猶為僭逆以君準臣天下疑懼孔子曰名不正則言不順言不順則事不成事不成則禮樂不興禮樂不興則刑罰不中刑罰不中則民無所措手足故君子名之必可言也伏願無惑邪言以為亂始其事乃寢

蕙田案楊孚之奏與賈大隱可稱二絕

唐書睿宗本紀景雲元年七月乙亥廢崇恩廟十月癸卯出義宗於太廟

禮樂志中宗崩中書令姚元之吏部尚書宋璟以謂義宗追尊之帝不宜列昭穆而其葬在洛州請立別廟於東都而有司時享其京廟神主藏於夾室由是祔中宗而光皇帝不遷遂為七室矣

舊唐書禮儀志景雲元年中書令姚元之吏部尚書宋璟奏言準禮大行皇帝山陵事終即合祔廟其太廟第

七室先祔皇兄義宗孝敬皇帝哀皇后裴氏神主伏以
義宗未登大位崩後追尊神龍之初乃特令遷祔春秋
之義國君即位未踰年者不合列叙昭穆又古者祖宗
各別立廟孝敬皇帝恭陵既在洛州望於東都別立義
宗之廟遷祔孝敬皇帝哀皇后神主命有司以時享祭
則不違先旨又協古訓人神允穆進退得宜在此神主
望入夾室安置伏願陛下以禮斷恩制從之及既葬祔
中宗孝和皇帝和思皇后趙氏神主於太廟其義宗即

於東都從善里建廟享祀

韋湊傳開元初遷將作大匠詔復孝敬皇帝廟號義宗
湊奏曰傳云必也正名禮祖有功宗有德其廟百世不
毀商有三宗周宗武王漢文帝為太宗武帝為世宗歷
代稱宗者皆方制海內德澤可尊列于昭穆是謂不毀
孝敬皇帝未嘗南面且別立寢廟無稱宗之義遂罷

蕙田案廢崇恩廟出義宗皆極是

唐書玄宗本紀開元四年六月太上皇崩十一月丁亥

遷中宗於西廟

舊唐書禮儀志開元四年睿宗崩及行祔廟之禮太常博士陳貞節蘇獻等奏議曰謹案孝和皇帝在廟七室已滿今睿宗大聖真皇帝是孝和之弟甫及仲冬禮當祔遷但兄弟入廟古則有焉遞遷之禮昭穆須正謹案禮論太常賀循議云兄弟不相為後也故殷之盤庚不序於陽甲而上繼於先君漢之光武不嗣於孝成而上承於元帝又曰晉惠帝無後懷帝承統懷帝自繼於世

祖而不繼於惠帝其惠帝當同陽甲孝成別出為廟又
曰若兄弟相代則共是一代昭穆位同至其當遷不可
兼毀二廟此蓋禮之常例也荀卿子曰有天下者事七
代謂從禰已上也尊者統廣故恩及遠祖若旁容兄弟
上毀祖考此則天子有不得全事於七代之義矣孝和
皇帝有中興之功而無後嗣請同殷之陽甲漢之成帝
出為別廟時祭不虧大袷之辰合食太祖奉睿宗神主
升祔太廟上繼高宗則昭穆永貞獻裸長序制從之初

今以儀坤廟為中宗廟尋又改造中宗廟於太廟之西
蕙田案兄弟不相為後者謂兄弟昭穆等倫
同堂異室祔則並祔祧則同祧不紊世次之
序耳非謂不相為後則不可同享於廟也陳
貞節等迺有出為別廟之議可謂未達於禮
矣

唐書玄宗本紀開元五年正月癸卯太廟四室壞遷神
主於太極殿素服避正殿輟視朝五日己酉享於太極

殿十月戊寅祔神主於太廟

禮樂志開元五年太廟四室壞奉其神主於太極殿天子素服避正殿輟朝三日時將行幸東都遂謁神主於太極殿而後行

陳貞節傳開元五年太廟壞天子舍神主太極殿營新廟素服避正寢三日不朝猶幸東都伊闕男子孫平子上書曰乃正月太廟毀此躋二帝之驗也春秋君薨卒哭而祔祔而作主特祀於主烝嘗禘於廟今皆違之魯

文公之二年躋僖於閔上後太室壞春秋書其災說曰
僖雖閔兄嘗為之臣臣居君上是謂失禮故太室壞且
兄臣於弟猶不可躋弟嘗臣兄乃可躋乎莊公薨閔公
二年而禘春秋非之况大行夏崩而太廟冬禘不亦亟
乎太室尊所若曰魯自是陵夷墮周公之祀太廟今壞
意者其將陵夷墮先帝之祀乎陛下未祭孝和先祭太
上皇先臣後君昔躋兄弟上今弟先兄祭昔太室壞今
太廟毀與春秋正同不可不察武后篡國孝和中興有

功今內主別祠不得列於世亦已薄矣夫功不可棄君
不可下長不可輕且臣繼君猶子繼父故禹不先鯀周
不先不窋宋鄭不以帝乙厲王不肖猶尊之也況中興
耶晉太康時宣帝廟地陷梁折又三年太廟殿陷而及
泉更營之梁又折天之所譴必非朽而壞也晉不承天
故及於亂臣謂宜遷孝和還廟何必違禮下同魯晉哉
帝異其言詔有司復議貞節獻與博士馮宗質之曰天
子七廟三昭三穆與太祖而七父昭子穆兄弟不與焉

殷自成湯至帝乙十二君其父子世六易乾鑿度曰殷之帝乙六世王則兄弟不為世矣殷人六廟親廟四并湯而六殷兄弟四君若以為世方上毀四室乃無祖禰是必不然古者由禰極祖雖迭毀迭遷而三昭穆未嘗闕也禮大宗無子則立支子又曰為人後者為之子無兄弟相為後者故捨至親取遠屬父子曰繼兄弟曰及兄弟不相入廟尚矣借有兄弟代歷承統告享不得稱嗣子嗣孫乃言伯考伯祖何統緒乎殷十二君惟三祖

三宗明兄弟自為別廟漢世祖列七廟而惠帝不與文
武帝孫昌衍文為漢太宗晉景帝亦文帝兄景絕世不
列於廟及告謚世祖稱景為從祖今謂晉武帝越崇其
父而廟毀及亡何漢出惠帝而享世長久乎七廟五廟
明天子諸侯也父子相繼一統也昭穆列序重繼也禮
兄弟相繼不得稱嗣子明睿宗不父孝和必上繼高宗
者偶室於廟則為二穆於禮可乎禮所不可而使天子
旁紹伯考棄已親正統哉孝和中興別建園寢百世不

毀尚何議哉平子猥引僖公逆祀為比殊不知孝和升
新寢聖真方祔廟則未嘗一日居上也帝語宰相召平
子與博士詳論博士護前言合軋平子平子援經辯數
分明獻等不能屈蘇頌右博士故平子坐貶都城尉然
諸儒以平子孤挺見迕於禮官不平帝亦知其直久不
決然卒不復中宗於廟

蕙田案平子之議漢魏以來儒者論禮皆未
之及也史稱其援經辯數分明人莫能屈豈

非理足者可以特立而諸儒為之不平又以見人心之大公耶乃卒坐貶而中宗不得復

廟惜哉

姚崇傳帝將幸東都而太廟屋自壞帝問宰相宋璟蘇頲同對曰三年之喪未終不可以行幸壞壓之變天所以示教戒陛下宜停東巡脩德以答至譴帝以問崇對曰臣聞隋取符堅故殿以營廟而唐因之且山有朽壤乃崩况木積年而木自當蠹乎但壞與行會不緣行而

壞且陛下以關中無年輸餉告勞因以幸東都所以為
人不為已也百司已戒供擬既具請車駕如行期舊廟
難復完盍奉神主舍太極殿更作新廟申誠奉大孝之
德也帝曰卿言正契朕意賜絹二百匹詔所司如崇言
舊唐書禮儀志開元十年正月下制曰朕聞王者乘時
以設教因事以制禮沿革以從宜為本取舍以適會為
先故損益之道有殊質文之用斯異且夫至德之謂孝
所以通乎神明大事之謂祀所以虔乎宗廟國家握紀

命歷重光累盛四方由其繼明七代可以觀德朕嗣守
丕業祗奉睿圖聿懷昭事罔不恤祀嘗覽古典詢諸舊
制遠則夏殷事異近則晉漢道殊雖禮文之不一固嚴
敬之無二朕以為立愛自親始教人睦也立敬自長始
教人順也是知朕率於禮緣於情或教以道存或禮從
時變將因宜以創制豈沿古而限今况恩以降殺而疎
廟以毀遷而廢雖式瞻古訓禮則不違而永言孝思情
所未足享嘗則止豈愛崇而禮備有禱而祭非德盛而

流永其祧室宜別為正室使親而不盡遠而不祧廟以
貌存宗由尊立俾四時式薦不間於毀主百代靡遷匪
唯於始廟所謂變以合禮動而得中嚴配之典克崇肅
雍之美茲在又兄弟繼及古有明文今中宗神主猶居
別處詳求故實當宁不安移就正廟用章大典仍創立
九室宜令所司擇日告遷

通志開元十年加置九廟移中宗神主就正廟仍創立
九室其後制獻祖懿祖太祖世祖高祖太宗高宗中宗

睿宗太廟九室也

唐書玄宗本紀開元十一年五月乙丑復中宗於太廟
八月戊申追號宣皇帝曰獻祖光皇帝曰懿祖

禮樂志開元十一年詔宣皇帝復祔於正室謚為獻祖
并謚光皇帝為懿祖又以中宗遷祔太廟於是太廟為
九室將親祔之而遇雨不克行乃命有司行事

案禮樂志一段

係十年事但與本紀
十一年事同故並列

舊唐書玄宗本紀開元十一年四月遷祔中宗祔主於

太廟八月尊八代祖宣皇帝廟號獻祖光皇帝廟號懿祖始祔於太祖之九廟

禮儀志開元十一年春玄宗還京師下制曰宗建宗廟禮之大者聿追孝享德莫至焉今宗以立尊親無遷序永惟嚴配致用蠲潔棟宇式宗禋奠斯受顧茲薄德獲承禋祀不躬不親曷展誠敬宜用八月十九日祇見九室於是追尊宣皇帝為獻祖復列於正室光皇帝為懿祖并遷中宗神主於太廟及將親祔會雨而止乃令所

司行事其京師中宗舊廟便拆毀之東都舊廟始移孝
敬神主祔焉其從善里孝敬舊廟亦令拆毀

蕙田案周制七廟兼文武兩世室而九故有
九廟之說然稱之曰世室猶非廟也復中宗
於廟是矣而加以九廟之名奚為者耶况所
謂九廟者止九室耳實一廟也混親廟與功
德而一之紊昭穆與世次而九之揆之古禮
失之遠矣

文獻通考胡氏寅曰范祖禹有言書云七世之廟可
以觀德則天子七廟自古而然也其祖宗有功德而
其廟不毀則無世數商之三宗周之文武是也然則
三昭三穆之外猶足以祖有功而宗有德矣明皇始
為九廟何所取乎夫先覺君子皆以漢儒祖有功宗
有德之論為非曰子孫於祖考無選擇而事之之義
是故天子七廟而已矣有祧焉不患其數盈也有禘
焉不患其乏享也今既以九廟為非而有功德之廟

不毀則九亦安足以盡之文武固造周者以功而論則成康身致太平刑措不用亦豈可毀耶是故宗廟之禮由于孫不忘而建不忘者仁也或七廟或五廟或三廟者禮也其有功德無功德非子孫所當祔祧而隆殺之也名之曰幽厲非子孫所當回隱而遷改之也一斷以先王之禮無敢損益於其間是則禮之盡也七世之廟可以觀德者吉凶善惡皆以是觀之云耳

朱子曰古人七廟恐是祖宗功德者不遷胡氏謂如此則是子孫得以去取其祖宗然其於續謚法又謂謚乃天下之公義非子孫得以私之如此則廟亦然唐書韋縚傳開元時縚遷太常唐興禮文雖具然制度時時繆缺不倫至顯慶中許敬宗建言遵亘以多為貴宗廟乃踰於天請大祀十二中祀十小祀八大祀中祀簠簋瓿俎皆一小祀無甒詔可二十三年勅令以遵亘之薦未能備物宜詔禮官學士並議以聞縚請宗廟遵

豆皆加十二又言郊奠爵容止一合容小則陋宜增大
之兵部侍郎張均職方郎中韋述議曰禮天之所生地
之所長苟可薦者莫不咸在聖人知孝子之情深而物
類無限故為之節使物有品器有數貴賤差降不得相
越周制王食用六穀膳用六牲飲用六清羞用百有二
十品珍用八物醬用百有二十醢而以四籩四豆供祭
祀此祀與賓客豐省不得同舊矣且嗜好燕私之饌與
時而遷故聖人一約以禮雖平生所嗜非禮則不薦所

惡是禮則不去屈建命去祥祭之艾曰祭典有不羞珍異不陳庶侈此則禮外之食前古不薦今欲以甘旨肥濃皆充於祭苟踰舊制其何極焉雖遵豆有加不能備也若曰以今之珍生所嗜愛求神無方是簠簋可去而盤盂栝案當御矣韶濩可抵而莖篴笙笛應奏矣且自漢以來陵有寢宮歲時朔望薦以常饌固可盡孝子之心至宗廟法享不可變古從俗有司所承一升爵五升散禮凡宗廟貴者以爵賤者以散此貴小賤大以示

節儉請如故

文獻通考二十三年正月勅文宗廟致享務在豐潔
禮經沿革必本人情遵豆之薦或未能備物宜令禮
官學士詳議具奏太常卿韋縉奏宗廟之奠每座遵
豆各加十二又酒爵制度全小僅無一合執持甚難
請稍令廣大付尚書省集衆官詳議太子賓客崔沔
議曰祭祀之興肇於太古人所飲食必先嚴獻未有
火化茹毛飲血則有毛血之薦未有麴蘖污樽杯飲

則有玄酒之奠施及後王禮物漸備作為酒醴嚴其
犧牲以致馨香以極豐潔故有三牲八簋之盛五齊
九獻之殷然以神道至玄可存而不能測也祭禮至
敬可備而不可廢也是以毛血腥爛玄樽犧象靡不
畢登於明薦矣然而薦貴於新味不尚褻雖則備物
猶存節制故禮云天之所生地之所長苟可薦者莫
不咸在備物之情也又曰三牲之俎八簋之實美物
備矣昆蟲之異草木之實陰陽之物備矣此節制之

文也。鉶俎邊豆簋罇罍實皆周人之時饌也。其用通於讌享賓客。而周公制禮咸與毛血玄酒同薦於先晉中郎。廬湛近古知禮者也。著家廟祭禮。皆晉時常食不復純用舊文。然則當時飲食不可闕於祀祭明矣。是變禮文而通其情也。我國家由禮立訓。因時制範。考圖史於前典。稽周漢之舊儀。清廟時享。禮饌畢陳。用周制也。而古式存焉。園寢上食。時膳具設。遵漢法也。而珍味極焉。職貢來祭。致遠物也。有新必薦。

順時令也苑囿之內躬稼所收蒐狩之時親發所中
莫不割鮮擇美薦而後食盡誠敬也若此至矣復何
加焉但當由勅祭如神在無或簡怠增最虔誠其進
珍饈或時鮮美考諸祠典有所漏略皆詳擇名目編
諸甲令因宜而薦以類相從則新鮮肥醲盡在是矣
不必加於籩豆之數也至於祭器隨物所宜故大羹
古食也盛於甑甑古器也和羹時饌也盛於鉶鉶時
器也亦有古饌而盛於時器故毛血盛於盤玄酒盛

於罇未有薦時饌而追用古器者古質而今文便於
事也雖加籩豆十二未足以盡天下美物而措諸清
廟有兼倍之名近於侈矣又據漢書藝文志墨家之
流出於清廟是以貴儉由此觀之清廟之不尚於奢
舊矣太常所請恐未可行又稱酒爵全小須加廣大
竊據禮文有以小為貴者獻以爵貴其小也小不及
制敬而非禮是有司之失其傳也固可隨失釐正無
待議而後革未知今制何所依准請兼詳古式據文

而行上曰享祀實思豐潔不應法制者亦不可用於
是更令太常加品味韋緇又請每室加遵豆各六每
四時異品以當時新果及珍羞同薦制可之又酌獻
酒爵上令用藥汁一升合於古義而多少適中自是
常依行焉二十四年勅宗廟祭享遵豆宜加獐鹿鶉
兔野雞等料夏秋供腊春冬供鮮仍令所司祭前十
日具數申省准料令殿中供送

唐書玄宗本紀開元二十九年立玄宗皇帝廟 天寶

二載加號元皇帝曰大聖祖咎繇曰德明皇帝涼武
昭王曰興聖皇帝改西京元宮曰太清宮東宮曰太
微宮 八載閏六月丙寅謁太清宮加上元皇帝號
曰聖祖大道元皇帝增祖宗帝后謚

肅宗本紀至德二載九月癸卯復京師至自靈武十一
月庚子作九廟神主告享於長樂殿

禮樂志安祿山之亂宗廟為賊所焚肅宗復京師設
次光順門外向廟而哭輟朝三日

嚴郢傳郢補太常協律郎守東都太廟祿山亂郢取
神主祕於家至德初定洛陽有司得以奉迎還廟擢
大理司直

乾元元年四月辛亥祔神主於太廟

禮樂志代宗寶應二年祧獻祖懿祖祔玄宗肅宗自是
之後常為九室矣

代宗本紀大歷十四年遷元皇帝於夾室祔代宗於太
廟

禮樂志代宗崩禮儀使顏真卿議太祖高祖太宗皆不毀而代祖元皇帝當遷於是遷元皇帝而祔代宗

舊唐書禮儀志大歷十四年十月代宗神主將祔禮儀使顏真卿奏議曰王制天子七廟三昭三穆與太祖之廟而七又禮器云有以多為貴者天子七廟又伊尹曰七代之廟可以觀德此經典之明證也七廟之外則曰去祧為壇去壇為墀故歷代儒者制迭毀之禮皆親盡宜毀伏以太宗文皇帝七代之祖高祖神堯皇帝國朝

首祚萬葉所承太祖景皇帝受命於天始封於唐元本皆在不毀之典代祖元皇帝地非開統親在七廟之外代宗皇帝升祔有日元皇帝神主禮合祧遷或議者以祖宗之名難於迭毀昔漢朝近古不敢以私滅公故前漢十二帝為祖宗者四而已至後漢漸違經意子孫以推美為先自光武已下皆有廟號則祖宗之名莫不建也安帝信讒害大臣廢太子及崩無上宗之奏後自建武以來無毀者因以陵號稱宗至桓帝失德尚有宗號

故初平中左中郎蔡邕以和帝以下功德無殊而有過
差不應為宗餘非宗者追尊三代皆奏毀之是知祖有
功宗有德存至公之義非其人不居蓋三代立禮之本
也自東漢以來則此道衰矣魏明帝自稱烈祖論者以
為逆自稱祖宗故近代此名悉為廟號未有子孫踐祚
而不祖宗先王者以此明之則不得獨據兩字而為不
合祧遷之證假令傳祚百代豈可上崇百代以為孝乎
請依三昭三穆之義永為通典

日知錄顧氏炎武曰漢惠帝從叔孫通之言郡國多置原廟元帝時貢禹以為不應古禮永光四年下丞相韋玄成等議以春秋之義父不祭於支庶之宅君不祭於臣僕之家王不祭於下土諸侯請勿復脩奏可因罷昭靈后武哀王昭哀后衛思后戾太子戾后園皆不奉祠後魏明元貴嬪杜氏魏郡鄴人生世祖及即位追尊為穆皇后配享太廟又立后廟於鄴高宗時相州刺史高閭表脩后廟詔曰婦人外成理無獨祀陰必配陽以成天地未聞有華之國立太妃之饗此乃先王所立一時之至感非經世之達制便可罷祀是古人罷祖宗之廟而不以為嫌也王莽尊元帝廟號高宗成帝號統宗平帝號元宗中興皆去之後漢和帝號穆宗安帝號恭宗順帝號敬宗桓帝號威宗桓帝尊母梁貴人曰恭懷皇后安帝尊祖母宋貴人曰敬隱皇后順帝尊母李氏曰恭愍皇后獻帝初平元年在中郎將蔡邕議孝和以下政事多蒙推

移臣下嗣帝殷勤各欲褒崇至親而已臣下懦弱莫能執正據禮和安順桓四帝不宜稱宗又恭懷敬隱恭愍三皇后並非正嫡不合稱后皆請除尊號制曰可唐高宗太子弘追謚孝敬皇帝廟號義宗開元六年將作大匠韋湊上言準禮不合稱宗於是傳義宗之號是古人除祖宗之號而不以為忌也後世浮文日盛有增無損德宗初立禮儀使吏部尚書顏真卿上言上元中政在宮壺始增祖宗之謚玄宗末姦臣竊命列聖之謚有加至十一字者紫周之文武言文不稱武言武不稱文豈盛德所不優乎蓋稱其至者故也故謚多不為褒少不為貶今列聖謚號太廣有踰古制請自中宗以上皆從初謚睿宗曰聖真皇帝玄宗曰孝明皇帝肅宗曰宣皇帝以省文尚質正名敦本上命百官集議儒學之士皆從真卿議獨兵部侍郎朱修官以兵進奏言陵廟玉冊木主皆已刊勒不可輕改事遂寢不知陵中玉冊所刻乃初謚也自

此宗廟之廣謚號之繁沿至後世遂成典故而人臣不敢議矣稱宗之濫始於王莽之三宗稱祖之濫始於曹魏之三祖唐王彥威所謂不可以訓者也

文獻通考德宗建中元年三月禮儀使上言東都太廟闕木主請造以祔初武后於東都立高祖太宗高宗三廟至中宗以後兩京太廟四時並享至德亂後木主多亡缺未祔於是議者紛然而大旨有三其一曰必存其廟遍立羣主時享之其二曰建廟立主存而不祭若皇輿時巡則就享焉其三曰存其廟瘞其主駕或東幸則

飾齋車奉京師羣廟之主以往議皆不決而罷

舊唐書禮儀志貞元十五年四月膳部郎中歸崇敬上
疏東都太廟不合置木主謹案典禮虞主用桑練主用
栗重作栗主則埋桑主所以神無二主猶天無二日土
無二王也今東都太廟是則天皇后所建以置武氏木
主中宗去其主而存其廟蓋將以備行幸遷都之所也
且殷人屢遷前八後五前後遷都一十三度不可每都
而別立神主也議者或云東都神主已曾虔奉而禮之

豈可以一朝而廢之乎且虞祭則立桑主而虔祀練祭則立栗主而埋桑主豈桑主不曾虔祀而乃埋之又所闕之主不可更作作之不時非禮也

唐會要天寶末兩都傾陷神主亡失肅宗既克復但建廟作主於上都其東都太廟毀為軍營九室神主失亡大歷間始於人間得之遂寓於太微宮不復祔享自建中至於會昌議者不一或以為東西二京宜皆有廟而舊主當瘞虛其廟以俟巡幸則載主而行

或謂宜藏神主於夾室或曰周豐洛有廟者因遷都
乃立廟耳今東都不因遷而立廟非也又曰古者載
主以行者唯新遷一室之主耳未有載羣廟之主者
也至武宗時悉廢羣議詔有司擇日修東都廟已而
武宗崩宣宗竟以太微神主祔東廟焉

蕙田案歸崇敬神無二主之說可決千古之
疑若依此制唐室安有東都之主亡失而寓
太微哉既已廟毀則瘞主可矣當時諸臣鮮

知禮者是以羣言淆惑迨於宣宗訖復脩廟
祔主惜哉

唐書禮樂志貞元十七年太常卿裴郁議以太祖百代
不遷獻懿二祖親盡廟遷而居東向非是請下百寮議
工部郎中張薦等議與真卿同太子左庶子李嶸等七
人曰真卿所用晉蔡謨之議也謨為禹不先鯀之說雖
有其言當時不用獻懿二祖宜藏夾室以合祭法逮廟
為祧而壇墠有禱則祭無禱則止之義吏部郎中柳冕

等十二人曰周禮有先公之祧遷祖藏於后稷之廟其
周未受命之祧乎又有先王之祧其遷主藏於文武之
廟其周已受命之祧乎今獻祖懿祖猶周先公也請築
別廟以居之司勳員外郎裴樞曰建石室於寢園以藏
神主至禘祫之歲則祭之考功員外郎陳京同官縣尉
仲子陵對曰遷神主於德明興聖廟京兆少尹韋武曰
祫則獻祖東向禘則太祖東向左司郎中陸淳曰議者
多矣不過三而已一曰復太祖之正位二曰並列昭穆

而虛東向三曰禘則獻祖禘則太祖迭居東向而復正
太祖之位為是然太祖復位則獻懿之主宜有所歸一
曰藏諸夾室二曰置之別廟三曰遷於園寢四曰祔於
興聖然而藏諸夾室則無享獻之期置之別廟則非禮
經之文遷於園寢則亂宗廟之儀唯祔於興聖為是至
十九年左僕射姚南仲等獻議五十七封付都省集議
戶部尚書王紹等五十五人請遷懿祖祔興聖廟議遂
定由是太祖始復東向之位

舊唐書禮儀志貞元十九年三月十五日遷獻祖懿祖
神主權祔德明興聖廟之幕殿二十四日享太廟自此
景皇帝始居東向之尊元皇帝已下依左昭右穆之列
矣二祖新廟成勅曰奉遷獻祖懿祖神主正太祖景皇
帝之位虔告之禮當任重臣宜令檢校司空平章事杜
佑攝太尉告大清宮門下侍郎平章事崔損攝太尉告
太廟又詔曰國之大事式在明禋王者孝享莫重於禘
祭所以尊祖而正昭穆也朕承列聖之休德荷上天之

瞻命虔奉牲帛二十五年永惟宗廟之位禘嘗之序夙
夜祗慄不敢自尊是用延訪公卿稽參古禮博考羣議
至於再三敬以令辰奉遷獻祖宣皇帝神主懿祖光皇
帝神主祔於德明興聖皇帝廟太祖景皇帝正東向之
位宜令所司循禮務極精嚴祗肅祀典載深感惕咨爾
中外宜悉朕懷

慈田案獻懿二祖祔興聖廟事詳見禘祫門
因有關廟制附載其略

唐書禮樂志德宗崩禮儀使杜黃裳議高宗在三昭三穆外當遷於是遷高宗而祔德宗蓋以中睿為昭穆矣
蕙田案兄弟不得為昭穆也

舊唐書禮儀志永貞元年十一月德宗神主將祔禮儀使杜黃裳與禮官王涇等請遷高宗神主於西夾室其議曰自漢魏以降沿革不同古者祖有功宗有德皆不毀之名也自東漢魏晉迄於陳隋漸違經意子孫以推美為先光武以下皆有祖宗之號故至於迭毀親盡禮

亦迭遷國家九廟之尊皆從周制伏以太祖景皇帝受命於天始封元本德同周之后稷也高祖神堯皇帝國朝首祚萬葉所承德同周之文王也太宗文皇帝應天靖亂垂統立極德同周之武王也周人郊后稷而祖文王宗武王聖唐郊景皇帝祖高祖而宗太宗皆在不遷之典高宗皇帝今在三昭三穆之外謂之親盡新主入廟禮合迭遷藏於西第一夾室每至禘祫之月合食如常於是祧高宗神主於西夾室祔德宗神主焉

元和元年七月順宗神主祔有司疑於遷毀太常博士
王湮建議曰禮經祖有功宗有德皆不毀之名也惟三
代行之漢魏已降雖曰祖宗親盡則遷無功亦毀不得
行古之道也昔夏后氏十五代祖顓頊而宗禹殷人七
代祖契而宗湯周人三十六王以后稷為太祖祖文王
而宗武王聖唐德厚流廣遠法殷周奉景皇帝為太祖
祖高祖而宗太宗皆在百代不遷之典故代宗升祔遷
代祖也德宗升祔遷高宗也今順宗升祔中宗在三昭

三穆之外謂之親盡遷於太廟夾室禮則然矣或諫者以則天太后革命中宗復而興之不在遷藏之例臣竊未諭也昔者高宗晏駕中宗奉遺詔自儲副而陟元后則天太后臨朝廢為廬陵王聖歷元年太后詔復立為皇太子屬太后聖壽延長御下日久奸臣擅命紊其紀度敬暉桓彥範等五臣俱唐舊臣匡輔王室翊中宗而承大統此乃子繼父業是中宗得之而且失之母授子位是中宗失之而復得之二十年間再為皇太子復踐

皇帝位失之在已得之在已可謂革命中興之義殊也
又以周漢之例推之幽王為犬戎所滅平王東遷周不
以平王為中興不遷之廟其例一也漢呂后專權產祿
秉政文帝自代邸而立之漢不以文帝為中興不遷之
廟其例二也霍光輔遷之廟其例三也伏以中宗孝和
皇帝於聖上為六代伯祖尊非正統廟亦親盡爰及周
漢故事是與中興功德之主不同奉遷夾室固無疑也
是月二十四日禮儀使杜黃裳奏曰順宗皇帝神主已

升祔太廟告祧之後即合遞遷中宗皇帝神主今在三昭三穆之外準禮合於太廟從西第一夾室每至禘祫之日合食如常於是祧中宗神主於西夾室祔順宗神主焉有司先是以山陵將畢議遷廟之禮有司以中宗為中興之君當百代不遷之位宰相召史官蔣武問之武對曰中宗以弘道元年於高宗柩前即位時春秋已壯矣及母后篡奪神器潛移其後賴張東之等同謀國祚再復此蓋同於反正恐不得號為中興之君凡非我

失之自我復之謂之中興漢光武晉元帝是也自我失
之因人復之晉孝惠孝安是也今中宗與惠安二帝事
同即不可為不遷之主也有司又云五王有再安社稷
之功今若遷中宗廟則五王永絕配享之例武曰凡配
享功臣每至禘祫年方合食太廟居常即無享禮今遷
中宗神主而禘祫之年毀廟之主並陳於太廟此則五
王配食與前時如一也有司不能答

元和十五年四月禮部侍郎李建奏上大行皇帝謚曰

聖神章武孝皇帝廟號憲宗先是淮南節度使李夷簡上議曰王者祖有功宗有德大行皇帝戡剪寇逆累有武功廟號合稱祖陛下正當決在宸斷無信齷齪書生也遂詔下公卿與禮官議其可否太常博士王彥威奏議大行廟號不宜稱祖宜稱宗從之其月禮部奏準貞觀故事遷廟之主藏於夾室西壁南北三間第一間代祖室第二間高宗室第三間中宗室伏以山陵日近睿宗皇帝祧遷有期夾室西壁三室外無置室處準江都

集禮古者遷廟之主藏於太室北壁之中今請於夾室
北壁以西為上置睿宗皇帝神主石室制從之

唐書王彥威傳彥威拜博士憲宗崩淮南李夷簡上言
大行皇帝功高宜稱祖穆宗下其議彥威奏古者始封
為太祖由太祖而降則又祖有功宗有德故夏人祖顓
頊而宗禹商人祖契而宗湯周人祖文王而宗武王魏
晉而下務欲推美自始祖外並建列祖之議叔世亂象
不可以為訓唐本周禮以景皇帝為太祖祖神堯而宗

太宗自高宗後咸稱宗以為成法不然太宗致升平玄宗清內難肅宗收復兩都皆撥亂反正猶不稱祖今當本三代之制黜魏晉亂法大行廟號宜稱宗制可

舊唐書禮儀志長慶四年正月禮儀使奏謹案周禮天子七廟三昭三穆與太祖之廟而七荀卿子曰有天下者祭七代有一國者祭五代則知天子上祭七廟典籍通規祖功宗德不在其數國朝九廟之制法周之文太祖景皇帝始為唐公肇基天命義同周之后稷高祖神

堯皇帝創業經始化隋為唐義同周之文王太宗文皇帝神武應期造有區夏義同周之武王其下三昭三穆之外是親盡之祖雖有功德禮合祧遷禘祫之歲則從合食制從之

冊府元龜太和四年四月禮儀使奏拆脩太廟西夾室遷移神主五位得大卜署令狀擇用四月二十四日吉其日先出室內先祧遷神主五位入幕殿便起首拆脩至五月五日畢功六日移神主入室詔依

開成五年禮儀使秦謹案天子七廟祖功宗德不在其
中國朝制度九廟九室伏以太祖景皇帝受封於唐高
祖太宗創業受命有功之主百代不遷今文宗元聖昭
獻皇帝升祔有時代宗睿文孝武皇帝是親盡之祖禮
合祧遷每至禘祫合食如常從之

唐書武宗本紀 會昌五年十月作昭武廟於虎牢關

唐會要 會昌五年七月中書門下李德裕奏孟州汜
水縣武牢關太宗擒王竇之地關城東峯有高祖太

宗像在一堂威靈皆畏於軒臺風雲疑遷於豐沛請
如漢郡國立廟故事更造一廟號昭武廟制可

蕙田案昭武廟非禮也

舊唐書禮儀志會昌五年八月中書門下奏東都太廟
九室神主共二十六座自祿山叛後取太廟為軍營神
主棄於街巷所司潛收聚見在太微宮內新造小屋之
內其太廟屋並在可以脩崇太和中太常博士議以為
東都不合置神主車駕東幸即載主而行至今因循尚

未脩建望令尚書省集公卿及禮官學官詳議如不要更置須有收藏去處如合置望以所拆大寺材木脩建既是宗室官居守便望令充脩東都太廟使勾當脩繕奉勅宜依

會昌六年三月太常博士鄭路等奏東都太微宮神主二十座去年三月二十九日禮院分析聞奏訖伏奉今月七日勅此禮至重須遵典故宜令禮官學官同議聞奏者臣今與學官等詳議訖謹具分析如後獻祖宣皇

帝宣莊皇后懿祖光皇帝光懿皇后文德皇后高宗天
皇大帝則天皇后中宗大聖大昭孝皇帝和思皇后昭
成皇后孝敬皇帝孝敬哀皇后已前十二座親盡迭毀
宜遷諸太廟祔於興聖廟禘祫之歲乃一祭之東都無
興聖廟可祔伏請且權藏於太廟夾室未題神主十四
座前件神主既無題號之文難申祝告之禮今與禮官
等商量伏請告遷之日但瘞於舊太微宮內空閒之地
恭酌事理庶協從宜制可太常博士段瓌等三十九人

奏議曰禮之所立本於誠敬廟之所設實在尊嚴既曰
薦誠則宜統一昔周之東西有廟亦可徵其所由但緣
卜洛之初既須營建又以遷都未決因議兩留酌其事
情匪務於廣祭法明矣伏以東都太廟廢已多時若議
增修稍乖前訓何者東都始制寢廟於天后中宗之朝
事出一時非貞觀開元之法前後因循不廢者亦踵鎬
京之文也記曰祭不欲數數則煩天寶之中兩京悉為
寇陷西都廟貌如故東都因此散亡是知九廟之靈不

欲歌其煩祀也自建中不葺之後彌歷歲年今若廟貌
維新即須室別有主舊主雖在大半合祧必几筵而存
之所謂宜祧不祧也孔子曰當七廟五廟無虛主也謂
廟不得無主者也舊主如有留去新廟便合創添謹案
左傳云祔練作主又戴載云虞而立几筵如或過時成
之便是以凶千古創添既不典虛廟又非儀考諸禮文
進退無守或曰漢於郡國置宗廟凡百餘所今止東西
立廟有何不安者當漢氏承秦焚燒之餘不識典故至

於廟制率意而行比及元成二帝之間貢禹韋玄成等
繼出果有正論竟從毀除足知漢初不本於禮經又安
可程法也或曰几筵不得復設寢廟何妨修營候車駕
時巡便合於所載之主者究其始終又得以論之昨者
降勅參詳本為欲收舊主主既不立廟何可施假令行
幸九州一一皆立廟乎愚以為廟不可修主宜藏瘞或
就瘞於塹室或瘞於兩階間此乃萬代常行不易之道
也其年九月勅段瓌等詳議東都不可立廟李福等別

狀又有異同國家制度須合典禮證據未一則難建立
宜並令赴都省對議須歸至當工部尚書薛元賞等議
伏以建中時公卿奏請修建東都太廟當時之議大者
有三其一曰必有其廟備立其主時享之日以他官攝
行二曰建廟立主存而不祭皇輿時巡則就享焉三曰
存其廟瘞其主臣等立其三議參酌禮經理宜存廟不
合置主謹案禮祭義曰建國之神位右社稷而左宗廟
禮記云君子將營宮室宗廟為先是知王者建邦設都

必先宗廟社稷况周武受命始都於豐成王相宅又卜於洛烝祭歲於新邑冊周公於太室故書曰戊辰王在新邑烝祭歲王入太室禼成王厥後復立於豐雖成洛邑未嘗久處逮於平王始定東遷則周之豐鎬皆有宗廟明矣又案曾子問廟有二主夫子對以天無二日土無二王嘗禘郊社尊無二上未知其為禮者昔齊桓作二主夫子譏之以為偽主是知二主不可並設亦明矣夫聖王建社以厚本立廟以尊祖所以京邑必有宗社

今國家定周秦之兩地為東西之兩宅闕九衢而立宮
闕設百司而嚴拱衛取法玄象號為京師既嚴帝宅難
虛神位若無宗廟何謂皇都然依人者神在誠者祀誠
非外至必由中出理合親敬用交神明位宜存於兩都
廟可偕立誠難專於二祭主不並設或以禮云七廟五
廟無虛主是謂不可無主所以天子巡狩亦有所尊尚
飾齋車載遷主以行今若修廟瘞主則東都太廟九室
皆虛既違於經須徵其說臣復探蹟禮意因得盡而論

之所云七廟五廟無虛主是謂見享之廟不可虛也今
之兩都雖各有廟禘祫享獻斯皆親奉於上京神主几
筵不可虛陳於東廟且禮云唯聖人為能享帝孝子為
能享親漢韋玄成議廢郡國祀亦曰立廟京師躬親承
事四海之內各以其職來祭人情禮意如此較然二室
既不並居二廟豈可偕祔但所都之國見享之廟既無
虛室則叶通經議者又欲置主不享以俟巡幸昔魯作
僖公之主不於虞練之時春秋書而譏之合祔之主作

非其時尚為所議今若置不合祔之主不因時而作違
經越禮莫甚於此豈有九室合享之主而有置而不享
之文兩廟始創於周公二主獲譏於夫子自古制作皆
範周孔舊典猶在足可明徵臣所以言東都廟則合存
主不合置今將修建廟宇誠不虧於典禮其見在太微
宮中六主請待東都修建太廟畢具禮迎置於西夾室
闕而不享式彰陛下嚴祀之敬以明聖朝尊祖之義吏
部郎中鄭亞等五人議據禮院奏以為東都太廟既廢

不可復修見在太微宮神主請瘞於所寓之地有乖經訓不敢雷同臣所以別進議狀請修祔主並依典禮兼與建中元年禮儀使顏真卿所奏事同臣與公卿等重議皆以為廟固合修主不可瘞即與臣等別狀意同但衆議猶疑東西二廟各設神主恐涉廟有二主之義請修廟虛室以太微宮所寓神主藏於夾室之中伏以六主神位內有不祧之宗今用遷廟之儀猶未合禮臣等猶未敢署衆狀蓋為闕疑太學博士直弘文館鄭遂等

七人議曰夫論國之大事必本乎正而根乎經以臻於中道聖朝以廣孝為先以得禮為貴求於典訓考乎大中廟有必修之文主無可置之理何則正經正史兩都之廟可徵禮稱天子不卜處太廟擇日卜建國之地則宗廟可知廢廟之說恐非所宜謹案詩書禮三經及漢朝正史兩都並設廟而載主之制久已行之敢不明徵而去文飾援據經文不易前見東都太廟合務修崇而舊主當瘞請於太微宮所藏之所皇帝有事於洛則奉

齋車載主以行太常博士顧德章議曰夫禮雖緣情將明厥要實在得中必過禮而多求則反虧於誠敬伏以神龍之際天命有歸移武氏廟於長安即其地而置太廟以至天寶初復不為建都而設議曰中宗立廟於東都無乖舊典徵其意不亦謬乎又曰東都太廟至於睿宗玄宗猶奉而不易者蓋緣嘗所尊奉不敢輒廢也今則廢已多時猶循莫舉之典也又曰雖貞觀之始草創未暇豈可謂此事非開元之法者謹案定開元六典勅

曰聽政之暇錯綜古今法以周官作為唐典覽其本末
千載一朝春秋謂考古之法也行之可久不曰然歟此
時東都太廟見在六典序兩都宮闕西都具太廟之位
東都則序而不論足明事出一時又安得曰開元之法
也又三代禮樂莫盛於周昨者論議之時便宜細大取
法於周遷而立廟今立廟不因遷何美之而不能師之
也又曰遷國神位右社稷而左宗廟君子將營宮室宗
廟為先者謹案六典永昌中則天以東都為神都邇後

漸加構宮室百司於是備矣今之宮室百司乃武氏改命所備也上都已建國立宗廟不合引言又曰東都洛陽祭孝宣等五帝長安祭孝成等三帝以此為置廟之例則又非也當漢兩處有廟所祭之帝各別今東都建廟作主與上都盡同概而論之失之甚者又曰今或東洛復太廟有司同日侍祭以此為數實所未解者謹案天寶三載詔曰頃四時有事於太廟兩京同日自今已後兩京各宜別擇日載於祀典可得而詳且立廟造主

所以祭神而曰存而勿祀出自何經當七廟五廟無虛主而欲立虛廟法於何典前稱廟貌如故者即指建中之中就有而言以為國之先也前以非時不造主者謂見有神主不得以非時而造也若江左至德之際主並散亡不可拘以例也或曰廢主之瘞請在太微宮者謹案天寶二年勅曰古之制禮祭用質明義兼取於尚幽情實緣於既沒我聖祖澹然常在為道之宗既殊有盡之期宜展事生之禮自今以後每至聖祖宮有昭告宜

改用卯時者今欲以主瘞於宮所即與此勅全乖又曰
主不合瘞請藏夾室者謹案前代藏主頗有異同至如
夾室儀用以序昭穆也今廟制既不中禮則無禘祫之
文又曰君子將營宮室以宗廟為先則建國營宮室而
宗廟必設東都既有宮室而太廟不合不營凡以論之
其義斯勝而西周東漢並曰兩都其各有宗廟之證經
史昭然又得以極思於揚榷詩曰其繩則直縮板以載
作廟翼翼大雅爪跂言豐廟之作也又曰於穆清廟肅

雍顯相洛邑既成以率文王之祀此詩言洛之廟也書
曰成王既至洛烝祭歲文王騂牛一武王騂牛一又曰
裸於太室康王又居豐命畢公保釐東郊豈有無廟而
可烝祭非都而設保釐則書東西之廟也逮於後漢卜
洛西京之廟亦存建武二年於洛陽立廟而成哀平三
帝祭於西京一十八年親幸長安行禘禮當時五室列
於洛都三帝留於京廟行幸之歲與合食之期相會不
奉齋車又安可以成此禮則知兩廟周人成法載主以

行漢家通制或以當虛一都之廟為不可而引七廟無
虛主之文禮言一都之廟室不虛主非為兩都各廟而
不可虛也聯出征之辭更明載主之意因事而言禮實
相統非如詩人更可斷章以取義也古人求神之所非
一奉神之意無二故廢桑主重作栗主既事理之易明
其一也或又引左氏傳築郿凡例謂有宗廟先君之主
曰都而立建主之論案魯莊二十八年冬築郿左傳為
築發凡例殺梁譏因數澤之利公羊稱避凶年造邑之

嫌三傳異同左氏為短何則當春秋二百年間魯凡城二十四邑唯郟一邑稱築城其二十三邑豈皆宗廟先君之主乎執此為建主之端又非通論或又曰廢之瘞之何以在於太微宮所藏之所宜舍故依新前已列矣案瘞主之位有三或於北牖之下或在西階之間廟之事也其不當立之主但隨其所以瘞之夫主瘞乎當立之廟斯不然矣以所在而言則太微宮所藏之所與漢之寢園無異歷代以降建一都者多兩都者少今國家

崇東西之宅極嚴奉之典而以各廟為疑合以建都故事以相質正即周漢是也今詳議所徵究其年代率皆一都之時豈可以擬議亦孰敢獻酬於其間詳考經旨古人謀寢必及於廟未有設寢而不立廟者國家承隋氏之弊草創未暇後雖建於垂拱而事有所合其後當干戈寧戢之歲文物大備之朝歷於十一聖不議廢之豈不以事出於一時廟有合立之理而不可一一革也今洛都之制上自宮殿樓觀下及百辟之司與西京無

異鑿與之至也雖所役之賤必歸其所理也豈先帝之主獨無其所安乎時也虞主尚瘞廢主宜然或以馬融李舟二人稱寢無傷於偕立廟不妨於暫虛是則馬融李舟可法於宣尼矣以此擬議乖當則深或稱凡邑有宗廟先君之主曰都無曰邑邑曰築都曰城者謹案二百四十年間惟郡一邑稱築如城即費之類各有所因或以他防或以自固謂之盡有宗廟理則極非或稱聖主有復古之功簡策有考文之美五帝不同樂三王不

同禮遭時為法因事制宜此則改作有為非有司之事也如有司之職但合一一據經變禮從時則須俟明詔也凡不修之證略有七條廟立因遷一也已廢不舉二也廟不可虛三也非時不造主四也合載遷主行五也尊無二上六也六典不書七也謹案文王遷豐立廟武王遷鎬立廟成王遷洛立廟今東都不因遷而欲立廟是違因遷立廟也謹案禮記曰凡祭有其廢之莫敢舉也有其舉之莫敢廢也今東都太廟廢已八朝若果立

之是違已廢不舉也謹案禮記曰當七廟五廟無虛主
今欲立虛廟是違廟不可虛也謹案左傳丁丑作僖公
主書不時也記又曰過時不祭禮也合禮之祭過時猶
廢非禮之主可以作乎今欲非時作主是違非時不作
主也謹案曾子問古者師行以遷廟主行乎孔子曰天
子巡狩必以遷廟主行載於齋車言必有尊也今也取
七廟之主以行則失之矣皇氏云遷廟主者載遷一室
之主也今欲載羣廟之主以行是違載遷之主也謹案

禮記曰天無二日土無二王嘗禘郊社尊無二上也今
欲兩都建廟作主是違尊無二上也謹案六典序兩都
宮闕及廟宇此時東都有廟不載是違六典不書也遍
考書傳並不合修寔以武德貞觀之中作法垂範之日
文物大備儒彥畢臻若可修營不應議不及矣記曰樂
由天作禮以地制天之體動也地之體止也此明樂可
作禮難變也伏惟陛下誠明載物莊敬御天孝方切於
祖宗事乃求於根本合再集議俾定所長臣實職司敢

不條白以對德章又有上中書門下及禮院詳議兩狀
並同載於後其一曰伏見八月六日勅欲修東都太廟
今會議事此時已有議狀准禮不合更修尚書丞郎已
下三十八人皆同署狀德章官在禮寺實忝司存當聖
上嚴禋敬事之時會相公尚古黜華之日脫國之祀典
有乖禮文豈唯受責於曠官竊懼貽羞於明代所以懃
懃懇懇將不言而又言也昨者異同之意盡可指陳一
則以有都之名便合立廟次則欲崇修廟宇以候時巡

殊不知廟不合虛主惟載一也謹案貞觀九年詔曰太原之地肇基王業事均豐沛義等宛譙約禮而言須議立廟時秘書監顏師古議曰臣旁觀祭典遍考禮經宗廟皆在京師不於下土別置昔周之豐鎬實為遷都乃是因事便營非云一時別立太宗許其奏即日而傳由是而言太原豈無都號太原爾時猶廢東都不立可知且廟室惟新即須有主主既藏瘞非虛而何是有都立廟之言不攻而自破矣又案曾子問曰古者師行必以

遷廟主行乎孔子曰天子巡狩必以遷廟主行載於齋
車言必有尊也今也取七廟之主以行則失矣皇氏云
遷廟主者唯載新遷一室之主也未祧之主無載行之
文假使候時巡自可修營一室議構九室有何依憑夫
宗廟尊事也重事也至尊至重安得以疑文定論言苟
不經則為擅議近者勅旨凡以議事皆須一一據經若
無經文任以史證如或經史皆無據者不得率意而言
則立廟東都正經史無據果從臆說無乃前後相違也

其二曰夫宗廟之設主於誠敬旋觀典禮二則非誠是以匪因遷都不可別立廟宇記曰天無二日土無二王嘗禘郊社尊無二上又曰凡祭有其廢之莫敢舉也有其舉之莫敢廢也則東都太廟廢已多時若議增修稍違前志何者聖歷神龍之際武后始復明辟中宗取其廟易置太廟焉本欲權固人心非經久之制也伏以所存神主既請祧藏今廟室維新即須有主神主非時不造廟寢又無虛議如修復以俟時巡唯載一主備在方

冊可得而詳又引經中義有數等或是弟子之語或是他人之言今廟不可虛尊無二上非時不造主合載一主行皆大聖祖及宣尼親所發明者比之常據不可同塗又丘明修春秋悉以君子定褒貶陳泄治以忠獲罪晉文以臣召君於此數條復稱君子將評得失特以宣尼斷之傳曰危疑之理須聖言以明也或以東都不同他都地有壇社宮闕欲議構葺似是無妨此則酌於意懷非曰經據也但以遍討今古無有壇社立廟之證用

以為說實所未安謹上自殷周旁稽故實除因遷都之外無別立廟之文制曰自古議禮皆酌人情必稷嗣知幾賈生達識方可發揮大政潤色皇猷其他管窺蓋不足數公卿之議實可施行德章所陳最為淺近豈得苟申獨見妄有異同事貴酌中禮宜從衆宜令有司擇日修崇太廟以留守李石充使勾當六年三月擇日既定禮官既行旋以武宗登遐其事遂寢

蕙田案德章之議詳盡確實可謂深於禮矣

會昌六年五月禮儀使奏武宗昭肅皇帝祔廟并合祧
遷者伏以自敬宗文宗武宗兄弟相及已歷三朝昭穆
之位與承前不同所可疑者其事有四一曰兄弟昭穆
同位不相為後二者已祧之主復入舊廟三者廟數有
限無後之主則宜出置別廟四者兄弟既不相為後昭
為父道穆為子道則昭穆同班不合異位據春秋文公
二年躋僖公何休云躋升也謂西上也惠公與莊公當
同南西上隱桓與閔僖當同北西上孔穎達亦引此義

釋經又賀循云殷之盤庚不序陽甲漢之光武上繼元
帝晉元帝簡文皆用此義毀之蓋以昭穆位同不可兼
毀二廟故也尚書曰七代之廟可以觀德且殷家兄弟
相及有至四帝不及祖禰何容更言七代於理無矣今
已兄弟相及同為一代矯前之失則合復祔代宗神主
於太廟或疑已祧之主不合更入太廟者案晉代元明
之時已遷豫章潁川矣及簡文即位乃元帝之子故復
豫章潁川二神主於廟又國朝中宗已祔太廟至開元

四年乃出置別廟至十年置九廟而中宗神主復祔太廟則已遷復入亦可無疑三者廟有定數無後之主出置別廟者索魏晉之初多同廟蓋取上古清廟一宮尊遠神祇之義自後晉武所立之廟雖云七主而實六代蓋景文同廟故也又案魯立姜嫄文王之廟不計昭穆以尊尚功德也晉元帝上繼武帝而惠懷愍三帝時賀循等諸儒議以為別立廟親遠義疎都邑遷異於理無嫌也今以文宗棄代纔六七年武宗甫邇復土遽移別

廟不齒祖宗在於有司非所宜議四者添置廟之室案禮論晉太常賀循云廟以容主為限無拘常數故晉武帝時廟有七主六代至元帝明帝廟皆十室及穆簡二帝皆至十一室自後雖遷故祔新大抵以七代為準而不限室數伏以江左大儒通蹟都典事有明據固可施行今若不行是議更以迭毀為制則當上不及高曾未盡之親下有忍臣子恩義之道今備討古今參校經史上請復代宗神主於太廟以存高曾之親下以敬宗文

宗武宗同為一代於太廟東間添置兩室為九代十一
室之制以全臣子恩敬之義庶協大順之宜得變禮之
正折古今之紛互立羣疑之杓指俾因心廣孝永燭於
皇明昭德事神無虧於聖代勅曰宗廟事重實資參詳
宜令尚書省兩省御史臺四品以上官大理卿京兆尹
等集議以聞尚書左丞鄭涯等奏議曰夫禮經垂則莫
重於嚴配必參損益之道則合典禮之文况有明徵是
資折衷伏自敬宗文宗武宗三朝嗣位皆以兄弟考之

前代理有顯據今謹詳禮院所奏並上稽古文旁撫史氏協於通變允為得宜臣等商議請依禮官所議從之

蕙田案古者七廟兄弟同廟而異室後世一廟兄弟異室而同昭穆所謂禮以義起九代十一室不得非之者也

十一月太常博士任疇上言去月十七日享德明興聖廟德廟直候論狀稱懿祖室在獻祖室之上當時雖以為然便依行事伏審獻祖為懿祖之昭懿祖為獻祖之

穆昭穆之位天地極殊今廟至奪倫不即陳奏尚為苟
且罪不容誅仍勅修撰朱儔檢討王皞研精詳覆得報
稱天寶二年制追尊咎繇為德明皇帝涼武昭王為興
聖皇帝十載立廟至貞元十九年制從給事中陳京右
僕射姚南仲等一百五十人之議以為禘祫是祖宗以
序之祭凡有國者必尊太祖今國家以景皇帝為太祖
太祖之上施於禘祫不可為位請接德明興聖廟共成
四室祔遷獻懿二祖謹尋儔等所報即當時表奏並獻

居懿上是歲以還不當失序四十餘載理難尋詰伏祈
聖鑒即垂詔勅具禮遷正其月儔又奏曰伏奉今月十
三日勅以臣所奏獻懿祖二室倒置事宜令禮官集議
聞奏者臣去月十七日緣過太廟祫享太祖景皇帝以
下羣主准貞元十九年所祔獻祖懿祖於德明廟共為
四室准元勅各於本室行享禮審知獻祖合居懿祖之
上昭穆方正其時親見獻祖之室倒居懿祖之下於後
遍校圖籍實見差殊遂敢聞奏今奉勅宜令禮官集議

聞奏者臣得奉禮郎李岡太祝柳仲年協律郎諸葛叟
李潼檢討官王皞修撰朱儔博士閔慶之等七人狀稱
謹案高祖神堯皇帝本紀及皇室圖譜并武德貞觀永
徽開元已來諸禮著在令甲者並云獻祖宣皇帝是神
堯之高祖懿祖光皇帝是神堯之曾祖以高曾辨之則
獻祖是懿祖之父懿祖是獻祖之子即博士任疇所奏
倒祀不虛臣等伏乞即垂詔勅具禮遷正其事遂行

宣宗即位迎太微宮神主祔東都太廟禘祫之禮盡出

神主合食於太祖之前

唐書禮樂志宣宗已復河湟二州七關歸其功順宗憲宗而加謚號博士李稠請改作神主易書新謚右司郎中楊發等議以謂古者已祔之主無改作加謚追尊非禮也始於則天然猶不改主易書宜以新謚寶冊告於陵廟可也是時宰相以謂士族之廟皆就易書乃就舊主易書新謚焉

冊府元龜楊發為左司郎中大中三年十二月宣宗追

尊順宗憲宗謚號禮院奏廟中神主已題舊號請改造
及重題詔禮官議發與都官郎中盧博獻議曰臣等伏
尋舊典粟主升祔之後在禮無改造之文亦無重加尊
謚改題神主之例求之曠古負無其文周加太王王季
文王之謚但以得合王周遂加王號未聞改謚易主且
文物大備禮法可稱最在兩漢並無其事光武中興都
洛陽遣大司馬臣鄧禹入關奉高祖已下十一帝后神
主祔洛陽宗廟蓋神主不合新造故也自魏晉迄於周

隋雖代有放恣之君亦有知禮講學之士不聞加謚追尊改主重題書之史冊今議者唯引東晉重造鄭太后神主事為證伏以鄭太后本琅琊王妃薨後已祔琅琊邸廟其後母以子貴將升祔太廟賀循請重造新主改題皇后之號備禮告祔當時用之伏以諸侯廟主與天子廟主長短不同若以王妃八寸之主上配至極禮似不同時謫臣貪君私用此謬禮改造神主比量晉事義絕非宜且宣懿非穆宗之后竇武宗之母以子之貴也

祔別廟正為得禮享薦無虧今若從祀至尊題主稱為
太后因子正得其宜今若改造新主題去太字即穆宗
上僊之後臣下追致作嬪之禮瀆亂正經實驚有職臣
當時並列朝行知其謬戾以漢律擅論宗廟者以大不
敬論又其時無詔下議遂默塞不敢出言今又欲重用
東晉謬禮穢媒聖朝大典猥蒙下問敢不盡言謹案國
朝例甚有明文武德元年五月備法駕於長安迎宣簡
公懿王景皇帝神主祔太廟既言於舊廟奉迎足明必

奉舊主其加謚追尊之禮自古本無其事則天太后攝政之後纍纍有之自此之後數用其禮歷檢國史並無改造重題之文若故事有之無不書於簡冊臣等愚見宜但告新謚於廟止其改造神主故事有開元初太常卿韋縉以高宗廟題武后神主云天后聖帝武氏縉奏請削去天后聖帝之號別題云則天順聖皇帝后武氏詔從之即不知其時削舊題耶重造主耶亦不知用何代典禮禮之疑者決在宸衷以臣所見但以新謚寶冊

告陵廟正得其宜改造重題恐乖禮意時宰臣覆奏就
神主改題而知禮者非之

舊唐書禮儀志中和元年夏四月有司請享太祖已下
十一室詔公卿議其儀太常卿牛叢與儒者同議其事
或曰王者巡狩以遷廟主行如無遷廟之主則祝奉幣
帛皮珪告於祖禰遂奉以出載於齋車每舍奠焉今非
巡狩是失守宗廟夫失守宗廟則當罷宗廟之事叢疑
之將作監王儉太子賓客李匡又虞部員外郎袁皓建

議同異及左丞崔厚為太常卿遂議立行廟以玄宗幸蜀時道宮玄元殿之前架幕為十一室又無神主題神版位而行事達禮者非之以為止之可也明年乃特造神主以祔行廟

光啓三年二月車駕自興元還京以宮室未備權駐鳳翔禮院奏皇帝還宮先謁太廟今宗廟焚毀神主失墜請准禮例修奉者禮院獻議曰案春秋新宮災三日哭傳曰新宮宣公廟也三日哭禮也案國史開元五年正

月二日太廟四室摧毀時神主皆存迎奉於太極殿安
置玄宗素服避正殿寶應元年肅宗還京師以宗廟為
賊所焚於光順門外設次向廟哭歷檢故事不見百官
奉慰之儀然上既素服避殿百官奉慰亦合情禮切循
故事比附參詳恐須宗正寺具宗廟焚毀及神主失墜
事由奏皇帝素服避殿受慰訖輟朝三日下詔委少府
監擇日依禮新造列聖神主如此方似合宜伏緣採粟
須十一月漸恐遲晚修奉使宰相鄭延昌具議中書門

下奏曰伏以前年冬再有震驚俄然巡幸主司宗祝迫以倉皇伏緣移蹕鳳翔未敢陳奏今則將回鑾輅皆舉典章清廟再營孝思咸備伏請降勅命所司參詳典禮修奉勅曰朕以涼德祇嗣寶圖不能上承天休下正人紀兵革競興於寓縣車輿再越於藩垣宗廟震驚丞嘗廢闕敬修典禮倍切哀摧宜付所司又修太廟使宰相鄭延昌奏太廟大殿十一室二十三間十一架功績至大計料支費不少兼宗廟制度有素難為損益今不審

依元料修奉為復更有商量請下禮官詳議太常博士
殷盈孫奏議言如依元料難以速成况帑藏方虛須資
變禮竊以至德二年以新修太廟未成其新造神主權
於長安殿安置便行享告之禮如同宗廟之儀以俟廟
成方為遷祔今京城除充大內及正衙外別無殿宇伏
聞先有詔旨欲以少府監大廳權充太廟其廳五間伏
緣十一室於五間之中陳設隘狹請更接續修建成十
一間以備十一室薦享之所其三太后廟即於少府監

取西南屋三間以備三室告享之所勅旨從之

右唐廟制

五代史梁本紀太祖開平元年追尊皇高祖黯廟號肅祖曾祖茂琳廟號敬祖祖信廟號憲祖考誠廟號烈祖

蕙田案以上後梁

唐本紀莊宗同光元年追尊曾祖執宜廟號懿祖祖國昌廟號獻祖考廟號太祖自唐高祖太宗懿宗昭宗為七廟

同光二年正月丁卯七廟神主至自太原祔於太廟
文獻通考同光二年太常禮院奏國家興建之初已於
北都置廟今尅復天下遷都洛陽却復本朝宗廟案禮
無二廟之文其北都宗廟請廢從之

蕙田案禮無二廟之說甚是

應順元年中書門下奏太常以太行山陵畢祔廟今太
廟見享七室高祖太宗懿宗昭宗獻祖太祖莊宗大行
升祔禮合祧遷獻祖下尚書集議從之時議者以懿祖

賜姓于懿宗以支庶繁大宗例宜以懿為始祖次昭宗可也不必祖神堯而宗太宗若依漢光武則宜于代州立獻祖而下親廟其唐廟依舊禮行之可也而議謚者忘咸通之懿宗又稱懿祖父子俱懿于理可乎將朱卯三世與唐室四廟連叙昭穆非禮也議桃者不知受氏於唐懿宗而桃之今又及獻祖以禮論之始桃昭宗次桃懿祖可也而懿祖如唐景皇帝豈可桃乎

蕙田案以上後唐

晉本紀天福二年追尊高祖璟廟號靖祖曾祖杲廟號肅祖祖昱廟號睿祖考紹雍廟號獻祖

文獻通考天福二年中書門下奏皇帝到京未立宗廟所司請立高祖以下四親廟其始祖一廟未敢輕議令都省百官集議御史中丞張昭議曰臣讀十四代史書見二千年故事觀諸家宗廟都無始祖之稱唯殷周二代以稷契為太祖禮記曰天子七廟三昭三穆與太祖之廟而七鄭玄注云此周制也七者太祖后稷及文王

武王與四親廟又曰殷人六廟契及成湯與二昭二穆也夏后氏立五廟不立太祖唯禹與二昭二穆而已據王制鄭玄所釋即殷周以稷契為太祖夏后氏無太祖亦無追謚之廟自殷周以來時更十代皆於親廟之中以有功者為太祖無追崇始祖之例具引今古即恐詞煩事要證明須陳梗概漢以高祖父太上皇無社稷功不立廟號高帝自為高祖魏以曹公相漢垂三十年始封于魏故為太祖晉以宣王輔魏有功立為高祖以景

帝始封于晉故為太祖宋世先世官閥卑微雖追崇帝號劉裕自為高祖南齊高帝之父位至右將軍生無封爵不得為太祖梁武帝父順之佐佑齊室封侯位至領軍丹陽尹雖不受封于梁亦為太祖陳武帝父文讚生無名位以武帝有功梁室贈侍中封義興公及武帝即位亦追為太祖周閔帝以父秦相西魏經營王業始封于周故為太祖隋文帝輔周室有大功始封于隋故為太祖唐高祖神堯祖父虎為周大柱國隋氏追封唐

公故為太祖唐末梁室朱氏有帝位亦立四廟朱氏先世無名位雖追冊四廟不立太祖朱公自為太祖此則前代追冊太祖不出親廟之成例也王者祖有功而宗有德漢魏之制非有功德不得立為祖宗殷周受命以稷契有大功於唐虞之際故追尊為太祖自秦漢之後其禮不然雖祖有功仍須親廟今粗言往例以取證明秦稱造父之後不以造父為始祖漢稱唐堯劉累之後不以堯累為始祖魏稱曹參之後不以參為始祖晉稱

趙將司馬卬之後不以卬為始祖宋稱漢楚元王之後
不以元王為始祖齊梁皆稱蕭何之後不以蕭何為始
祖陳稱太丘長陳寔之後不以寔為始祖元魏稱李陵
之後不以陵為始祖後周稱神農之後不以神農為始
祖隋稱楊震之後不以震為始祖唐稱臯陶老子之後
不以臯陶老子為始祖唯唐高宗則天武后臨朝革唐
稱周便立七廟仍追冊周文王姬昌為始祖此蓋當時
附麗之徒不諳故實武立姬廟乖越已甚曲臺之人到

今嗤謂臣遠觀秦漢下至周隋禮樂衣冠聲明文物未
有如唐室之盛武德議廟之初英才間出如溫魏顏虞
通今古封禪薛杜達禮儀制度憲章必有師法夫追先
王先母之儀起於周代據史記及禮經云武王繼太王
王季文王之緒一戎衣而有天下尊為天子宗廟享之
周公成文武之德追王太王王季祀先公以天子之禮
又曰郊祀后稷以配天據此言之周武雖祀七世追為
王號者但四世而已故自東漢以來有國之初多崇四

廟從周制也况殷因夏禮漢習秦儀無勞博訪之文宜約已成之制請依隋唐有國之初創立四廟推四世之中名位高者為太祖謹議以聞勅令尚書省集議奏聞乃倣唐朝舊制追尊四廟

蕙田案張昭之議頗達古今事變非禮制也五代史晉本紀出帝天福七年十一月庚子祔高祖神主于太廟

蕙田案以上後晉

漢本紀天福十二年

漢雖建國而追續天福為十二年

追尊高祖端廟

號文祖曾祖昂廟號德祖祖僎廟號翼祖考璵廟號顯祖以漢高皇帝為高祖光武皇帝為世祖皆不祧

文獻通考天福十二年

時漢高祖已即位尚仍天福之號

太常博士段

顯奏請立高曾祖禰四廟更上追遠祖光武皇帝為百代不遷之廟居東向之位吏部尚書竇正固等議古者四親廟之外祖功宗德不拘定數今除四親廟外更請追尊高皇帝光武皇帝共立六廟從之

宋史竇貞固傳貞固在晉拜刑部尚書漢祖入汴貞固與禮部尚書王淞率百官見于滎陽西漢祖駐馬勞問久之初營宗廟帝以姓自漢出遂襲國號尊光武為世祖并親廟為五詔羣臣議貞固上言曰案王制天子七廟諸侯五大夫三士一正義曰周之制七廟者太祖及文王武王之祧與親廟四也又曰七廟者據周也有其人則七無其人則五至光武中興及魏晉宋齊隋唐或立六廟或立四廟蓋建國之始未盈其數也禮曰德厚

者流光此天子可以祀六世之義也今陛下大定寰區
重興漢祚旁求典禮用正宗祧伏請立高曾祖禰四親
廟及自古聖王祖有功宗有德更立始祖在四廟之外
不拘定數所以或五廟或七廟今請尊高帝光武皇帝
為世祖法文王武王不遷之制用歷代六廟之規庶合
典禮漢祖從之論者以天子建國各從其所起堯自唐
侯禹生大夏是也立廟皆祖其功商之契周之后稷漢
之武帝晉之三廟是也高祖起于晉陽而追嗣兩漢徒

以同姓為遠祖甚非其義貞固又以四親匹庶上合高
光失之彌遠矣但援立親廟可也餘皆非禮

又獻通考馬氏曰後唐晉漢皆出于夷狄者也莊宗
明宗既捨其祖而祖唐之祖矣及收瑋知遠崛起而
登帝位俱欲以華胄自詭故于四親之外必求所謂
始祖者而祖之張昭之言議正而詞偉矣至漢初則
段颺竇正固之徒曲為譎附乃至上祖高光以為六
廟然史所載出自沙陀部之說固不可掩也竟何益
哉

蕙田案以上後漢

五代史周本紀廣順元年五月辛未追尊祖考為皇帝

妣為皇后高祖璟謚曰睿和廟號信祖祖妣張氏謚曰睿恭曾祖諡曰明憲廟號僖祖祖妣申氏謚曰明孝祖蘊謚曰翼順廟號義祖祖妣韓氏謚曰翼敬考謚曰章肅廟號慶祖妣王氏謚曰章德

文獻通考廣順元年有司議立四親廟從之

五代史周本紀廣順三年十二月戊申四廟神主至自西京迎之於西郊祔於太廟乙亥享於太廟

宋史聶崇義傳崇義周顯德中累遷國子司業兼太常

博士先是世宗以郊廟祭器止由有司相承製造年代
浸久無所規式乃命崇義檢討摹畫以聞四年崇義上
之乃命有司改造焉

五代史周本紀顯德五年夏四月庚申祔五室神主於

新廟

蕙田案以上後周

右五代廟制

五禮通考卷八十